

14. gr.

Eigi má verja fé sjóðsins til að ráða bót á rekstrarerfiðleikum eða fjárhagsvanda framleiðanda lagmetis eða til að standa straum af fjárfestingum í framleiðslutækjum eða mannvirkjum þeirra.

15. gr.

Tekjur sjóðsins eru sem hér segir:

- a) Öll þau gjöld, sem lögð eru á niðursoðnar og niðurlagðar sjávarafurðir og grásleppuhrogn til ársloka 1977 skv. 3. málslíð 6. gr. 1. um Sölustofnun lagmetisiðnaðarins, sbr. 2. mgr. ákvæðis til bráðabirgða í l. nr. 5/1976 um útflutningsgjöld af sjávarafurðum.
- b) Vextir.
- c) Aðrar tekjur.

16. gr.

Framkvæmdastjóri Sölustofnunar lagmetisiðnaðarins er framkvæmdastjóri og prókúruhafi sjóðsins. Gerir hann tillögur til stjórnar sjóðsins um ráðstafanir á fé sjóðsins og nýtingu.

17. gr.

Sjóðurinn hefur sjálfstætt reikningshald og skal stjórn hans árlega gera iðnaðarráðherra grein fyrir störfum og stöðu sjóðsins. Skýrsla skal afhent ráðherra um leið og endurskoðaðir reikningar sjóðsins eru lagðir fram.

Drög að framkvæmda- og fjárhagsáætlun sjóðsins skal senda iðnaðarráðherra í upphafi hvers starfsárs.

18. gr.

Reikningar sjóðsins skulu endurskoðaðir af Ríkisendurskoðuninni.

19. gr.

Reglugerð þessi, sem sett er samkvæmt lögum um Sölustofnun lagmetisiðnaðarins nr. 48 26. maí 1972, staðfestist hér með til að öðlast þegar gildi.

Jafnframt fellur úr gildi reglugerð nr. 128 24. apríl 1973 um Sölustofnun lagmetisiðnaðarins og breyting á þeirri reglugerð, nr. 434 15. ágúst 1974.

Iðnaðarráðuneytið, 7. október 1976.

Gunnar Thoroddsen.

Árni Þ. Arnason.

REGLUGERÐ

um Starfsmannaráð Pósts og síma.

1. gr.

Innan Pósts og síma skal starfa starfsmannaráð, skipað 8 mönnum. Í starfsmannaráði eiga sæti forstjórar aðaldeilda Pósts og síma (fjármáladeild, tæknideild, umsýsludeild og viðskiptadeild) og umdæmisstjóri í Umdæmi I, form. Félags íslenskra símamanna, formaður Póstmannafélags Íslands og einn fulltrúi tilnefndur af Félagi íslenskra símamanna. Auk þess á varamaður formanns Póstmannafélags Íslands, sem félagið tilnefnir, sæti á fundum ráðsins með málfrelsi og tillögurétti.

2. gr.

Starfsmannaráð kýs sér formann og varaformann til eins árs í senn úr hópi fulltrúa stjórnenda Pósts og síma og ritara og vararitara úr hópi fulltrúa félaganna.

Starfsmannaráð getur ákveðið fasta fundardaga og haldið aukafundi eftir því sem þörf krefur, svo og ef a. m. k. þrír atkvæðisbærir ráðsmenn krefjast, en aldrei skulu þó haldnir færri en tólf fundir á ári. Formaður boðar fundi með dagskrá og stjórnar þeim. Fundir eru ályktunarbærir ef 5 atkvæðisbærir ráðsmenn eru mættir, enda hafi allir verið boðaðir. Að jafnaði skal ekki afgreiða mál, er heyra undir einhvern fulltrúa stofnunarinnar í ráðinu, að honum fjarstöddum, né heldur mál er varða starfsfólk að fjarstöddum fulltrúum viðkomandi félags.

Halda skal gjörðabók, þar sem fundarefni og afgreiðsla mála er skráð. Ef ráðið er ekki sammála hafa einstakir ráðsmenn rétt á að fá bókuð stutt efnisleg sérálit. Afgreiðsla mála og sérálit skulu jafnan fylgja til þess aðila, sem fær málið til endanlegrar afgreiðslu. Allir fundarmenn skulu undirrita fundargerð.

3. gr.

Starfsmannaráð er ráðgefandi um þau mál, sem það tekur til meðferðar og gerir skriflegar tillögur eða umsögn um þau til Póst- og símamálastjóra. Ráðið getur kallað starfsmenn Pósts og síma á sinn fund til að fá upplýsingar um mál. Ef um er að ræða mál, sem snerta störf umdæma, sem ekki eiga fulltrúa í starfsmannaráði, skal leitað álits viðkomandi umdæmisstjóra.

Áður en starfsmannaráð tekur afstöðu til stöðuveitinga, skal leitað álits næsta yfirmanns þeirrar stöðu, sem um er að ræða.

4. gr.

Starfsmannaráð fjallar um þau mál, er varða launakjör og starfsaðstöðu starfsfólks, skipun og setningu í stöður og frávikningu svo og önnur mál er varða hagsmuni einstakra starfsmanna eða starfshópa, hvort sem þau berast frá Póst- og símamálastjóra eða einstakir ráðsmenn bera þau fram. Skal að jafnaði kynna málin með dagskrá.

5. gr.

Starfsmannaráð fjallar um þau mál, er varða hag og rekstur Pósts og síma. Skal leitast við að auka áhuga starfsfólksins á því að gefa ráðinu ábendingar um það, sem betur mætti fara og gera tillögur til úrbóta og senda þær starfsmannaráði. Póst- og símamálastjóri getur veitt starfsmönnum viðurkenningu fyrir slíkar tillögur, eftir ábendingu starfsmannaráðs.

6. gr.

Umræður á fundum ráðsins, er varða einstaka menn persónulega, skulu vera trúnaðarmál.

Reglur þessar eru hér með settar samkvæmt 8. gr. laga nr. 8/1935, um stjórn og starfrækslu Pósts og síma til að öðlast þegar gildi og birtast til eftirbreytni öllum þeim, sem hlut eiga að máli.

Jafnframt fellur úr gildi reglugerð nr. 146/1953, um breytingu á reglum um starfrækslu landsímans, frá 27. febrúar 1935.

Samgönguráðuneytið, 8. október 1976.

Halldór E. Sigurðsson.

Brynjólfur Ingólfsson.